



Broj: UP1:01-50-2-1736-1/23
Sarajevo, 24.04.2023. godine

Na osnovu člana 14. stav (2) Zakona o slobodi pristupa informacijama u Bosni i Hercegovini („Službeni glasnik BiH“, br. 28/00, 45/06, 102/09, 62/11 i 100/13), a u vezi sa članom 193. Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16), rješavajući po zahtjevu Centara civilnih inicijativa Tuzla za slobodu pristupa informacijama od 14. 4. 2023. godine, šefica Kabineta - savjetnik ministra komunikacija i prometa Bosne i Hercegovine, po ovlaštenju ministra komunikacija i prometa Bosne i Hercegovine broj 04-07-2-371/23 od 9. 2. 2023. godine, donosi

RJEŠENJE **o slobodi pristupa informacijama**

Centrima civilnih inicijativa Tuzla odobrava se pristup informacijama po zahtjevu od 14. 4. 2023. godine.

O b r a z l o ž e n j e

Centri civilnih inicijativa Tuzla obratili su se 14. 4. 2023. godine Ministarstvu komunikacija i prometa Bosne i Hercegovine (u daljnjem tekstu: Ministarstvo) zahtjevom za slobodu pristupa informacijama u skladu sa odredbama Zakona o slobodi pristupa informacijama u Bosni i Hercegovini („Službeni glasnik BiH“, br. 28/02, 45/06, 102/09, 62/11 i 100/13, u daljnjem tekstu: Zakon).

U zahtjevu je navedeno da se traži pristup sljedećim informacijama: *1. Informacija o trenutnom statusu i budućim planovima Ministarstva povodom izrade i donošenja Zakona o elektronskim komunikacijama i medijima. 2. Informacija da li je Radna grupa, formirana u maju 2018. godine sastavljena od predstavnika Ministarstva, Regulatorne agencije za komunikacije BiH i Direkcije za evropske integracije Vijeća ministara BiH, od 2018. godine do sada imala aktivnosti na doradi Nacrta zakona o elektronskim komunikacijama i medijima. 3. Generalni stav Ministarstva o trenutnom stanju i potrebama unapređenja zakonskih rješenja iz oblasti medija u Bosni i Hercegovini.*

U skladu sa članom 11. Zakona, utvrđeno je da je zahtjev uredan.

Postupajući po predmetnom zahtjevu, Ministarstvo je, u skladu sa članom 14. stav (1) Zakona i Vodiča o slobodi pristupa informacijama broj: 01-04-50-2-3460/12 od 28. 5. 2012. godine, poduzelo sve potrebne radnje kako bi prikupilo tražene informacije i razmotrilo sve činjenice i okolnosti koje su značajne za obradu predmetnog zahtjeva.

U konkretnom postupku, informira se podnositelj zahtjeva da je Predstavnički dom Parlamentarne skupštine Bosne i Hercegovine Zaključkom sa 15. sjednice, održane 11. 1. 2021. godine, naložio Ministarstvu da se oblast elektronskih komunikacija i oblast elektronskih medija uredi sa dva odvojena zakona i da se odustane od pripreme Prednacrt zakona o elektronskim komunikacijama i elektronskim medijima. Postupajući po navedenom zaključku, odlukama ministra formirane su dvije radne grupe 22. 9. 2021. godine, i to Radna grupa za pripremu Prednacrt zakona o elektronskim komunikacijama u Bosni i Hercegovini (u daljnjem tekstu: Radna grupa za pripremu Prednacrt ZEK) i Radna grupa za pripremu Prednacrt zakona o elektronskim medijima (u daljnjem tekstu: Radna grupa za pripremu Prednacrt ZEM).

Radne grupe za pripremu Prednacrt ZEK i Prednacrt ZEM čine predstavnici Ministarstva, Regulatorne agencije za komunikacije BiH, Ministarstva saobraćaja i veza Republike Srpske, Ministarstva za naučnotehnološki razvoj, visoko obrazovanje i informaciono društvo Republike Srpske, Federalnog ministarstva prometa i komunikacija i Direkcije za evropske integracije Vijeće ministara. Priprema teksta Prednacrt ZEK je u završnoj fazi i usklađen je u maksimalnoj mogućoj mjeri sa direktivama EU 2014/61 i 2018/1972. Priprema teksta Prednacrt ZEM je u radnoj fazi i bit će usklađen u najvećoj mogućoj mjeri sa direktivama EU 2010/13 i 2018/1808.

Nakon što radne grupe okončaju aktivnosti na pripremi prednacrt zakona, provest će se eKonsultacije predmetnih prednacrt zakona, radne grupe će izraditi nacrt zakona i propisanom ih procedurom dostaviti u Generalni sekretarijat Vijeća ministara Bosne i Hercegovine na utvrđivanje nacrt zakona na nekoj od sjednica. Vremenski okvir usvajanja ZEK-a i ZEM-a je prva polovina 2024. godine i definiran je u Srednjoročnom programu rada Vijeća ministara Bosne i Hercegovine za 2023-2025. godinu.

Također, Radna grupa za pripremu Prednacrt zakona o elektronskim komunikacijama i elektronskim medijima, formirana u maju 2018. godine, do kraja 2020. godine je pripremila tekst Prednacrt zakona, ali nije nastavila aktivnosti zbog prethodno navedenog zaključka Parlamentarne skupštine Bosne i Hercegovine.

Svakako da područje elektronskih medija u BiH nije adekvatno uređeno, prije svega nepostojanjem adekvatne legislative i njene neusklađenosti sa EU regulatornim okvirom, što dovodi do brojnih problema u funkcioniranju i poštivanju općih principa EU kad su u pitanju i medijske slobode, ali i funkcioniranje i transparentnost samih medija. Donošenjem novog zakona o elektronskim medijima u BiH, koji će u maksimalnoj mjeri biti usklađen sa relevantnim direktivama EU iz ove oblasti, brojna pitanja bi trebala biti riješena, prije svega transparentnost i koncentracija vlasništva nad medijima, kao i zaštita pluralizma i raznovrsnosti medija. Također, kao važan stub društva potrebno je urediti i ojačati poziciju sistema javnog emitiranja u BiH, podići nivo transparentnosti javnih RTV servisa koji će biti odgovorni javnosti, urediti međusobne odnose unutar tri Javna RTV servisa, otkloniti određene nedostatke po pitanju finansijske održivosti i slično, a što bi se dijelom trebalo definirati i donošenjem novog zakona o javnom radiotelevizijskom sistemu u Bosni i Hercegovini.

U skladu sa navedenim, odlučeno je kao u dispozitivu ovoga rješenja.

Uputstvo o pravnom lijeku: Protiv ovog rješenja dozvoljena je žalba Žalbenom vijeću pri Vijeću ministara Bosne i Hercegovine u roku od 15 dana od dana njegovog prijema.

U slučaju da podnositelj zahtjeva nije zadovoljan postupanjem ovog organa, ima pravo obraćanja Ombudsmenu za ljudska prava Bosne i Hercegovine, Akademika Jovana Surutke 13, 78 000 Banja Luka.



Dostavljeno:

- Centri civilnih inicijativa, Ludviga Kube 7, 75000 Tuzla;
- spis predmeta;
- a/a.